

FACULTATIS MEDICAE
IN ACADEMIA LIPSIENSI
PRO-CANCELLARIUS
D. IO. ZACHARIAS PLATNER
PATHOL. P. P. ORD. ACAD. DECENVIR
COLLEGII MAI. PRINCIPVM SOCIVS
PANEGYRIN MEDICAM
D. XXVII. OCTOBRIS ANNO MDCCXLI.
CELEBRANDAM
INDICIT
ET
DE SOMNO IN CVBICVLIS PERCALEFACTIS
DISSERIT.

THE UNIVERSITY OF CHICAGO

LIBRARY

1971-1972

1971-1972

1971-1972

1971-1972

1971-1972

1971-1972


1971-1972

1971-1972

1971-1972

1971-1972

1971-1972



ui valere & fenescere cupiunt, eos ita agere oportet, ut naturale corporis & partium solidarum robur exquisitiori cura tueantur, cum morbis nihil magis obnoxium sit, quam illarum infirmitas. Ad hoc vero multum valere, & exercitationem, & victum, & moderatum veneris, somni, aliarumque rerum, quibus vita continetur, usum, peruulgatum est. Sed inter eos, qui sani sunt, at vero imbecilli, quo in numero magna pars urbanorum, omnesque pene cupidi literarum, sunt, reperiuntur plures, quibus nimia valetudinis cura, molliorque corporis cultus, varia incommoda afferre solet. Sunt enim multi, qui, quoduis morborum genus praevententes, victus cultusque consuetudinem ne minimum mutare unquam audent, quibus sollicitus metus, quo omnis vitae iucunditas impeditur, magis nocet, quam res, quae timetur. Alii, ut morbos auertant, in secunda valetudine, aduersae praesidia consumunt, & dum valetudinem variis auxiliis, deuoratis etiam quotidie medicamentis, sustentare volunt, sibi morbos excitant. Iam de iis dicam, qui, quod frigus timent, dormitoria cubicula, in quibus se somno dare soliti sunt, percalefaciunt, & hoc calore corpus effoeminant omnesque nervos emolliunt. Hoc vero ut clarum sit ac euidens, considerare oportet aera, quem rariores ac spongiis affimiles pulmones hauriunt, & qui etiam corporum, quae eo circumfusa sunt, expirationes moderatur. Nec omittendum est, aëra se in ipsum corpus fundere, cum eius non minimam vim humidis nostris admixtam esse variis experimentis intelligatur. Necesse vero est, ut aër, sine quo animantium corpora, nec ali, nec crescere, possunt, & qui his quasi vitalem spiritum praebere videtur, calore tenuatus sit, eo

tamen moderato, & ad temperationem corporis apto. Nam, & frigoris, & caloris, exsuperantiam animalia grauitè offendere, imò vita expellere, nemo ignorat. Id vero semper in controuersia fuit, quid calorem animalibus praestet. Animus non est, ea, quae veteres de calore innato, alii de sanguinis fermentatione, nec non alii de flammula cordis, commenti sunt, nec diuersas recentiorum sententias, exponere argumentisque oppugnare & refellere. A vero propius est, omnem animalium calorem ab humidorum, & sanguinis praecipue, motu & attritu in arteriis venisque proficisci, cum is omnis extinguatur, quam primum ille motus prohibetur, quo sanguis ex corde per arterias in omne corpus diffunditur. Contra ea caloris vis intenditur, si sanguis, vel valentiori impulsu, vel celeriori motu, agitur & per arterias proiicitur, quod vtrumque in febribus fieri solet. Hunc vero etiam non parum auget renixus, quare, si arteriae ac venae in aliqua sede ita comprimuntur, vel vinculis constringuntur, ut motus non omnis prohibeatur, sed impeditior fiat, in ea parte calor multum augefcit. Negan- dum tamen non est, ipsum sanguinem plurimum conferre, si is, nec abundat, nec deficit. Etiam, qui modice crassus rubensque est, longe facilius incalescit, quam, qui nimium tenuis, aqua & pituita mistus, & colore liuidus est, qualis in piscibus, & in aegris, esse solet, quos aqua inter cutem male habet. Nec minus compertum est, vitalem calorem in animalibus augeri, minuique aliis, veluti iis, qui per varias vias humidis admiscuntur, praecipue autem aëre, quo corpus circumfusus est. Huius enim ardore corpus inflammari, frigore autem gelari, omnes nouimus. Cum vero aliquis dubitare possit, sanguinem omneque corpus ex attritu incalescere; id quidem oculis cernimus, corpora dura, dum teruntur, inflammari, idque multo magis, si valentior pressura & maior celeritas adhibetur. Et corpora haec, quo duriora sunt, eo maior in iis ex attritu nascitur calor, ita, ut etiam exardescant, & verum ignem concipiant. Hoc chalybi ferroque durissimo incidit, si ad illud filex alliditur, quod non solum ignitur, sed in

glo.

globulos funditur, imo in vitrum vertitur. α) Sed vero, cum haec nemini ignota sint, nec facile in dubium vocari possint, de eo tamen non omnes consensuros esse prouideo, hoc, quod in solidis durisque corporibus fit, etiam fieri in fluidis, cum non pauci cum THOMAS WILLISIO β) putent, *liquida*, vtut plurimum concussa & agitata, *haudquaquam intepescere*. Liquida vero magnum discrimen recipiunt, &, quamuis aqua pura in fistula, vel canali, diu multumque commota, parum tepefcat, tepefcent tamen humida crassiora & ex elementis composita, quae oleum, vel sulphur, habent, quod ignem concipere & flammam alere potest. Et mulierculae, pingue lactis cremoremque in ligneo vase in butyrum densantes, experiri possunt, etiam serum quasi fando fuisse tepefactum. Hanc rem omnem, inter alios, aperte planeque explicauit doctus & ingeniosus Auctor GEORGIUS MARTINIVS, γ) qui etiam probat, calorem, non tam ab attritu minutarum sanguinis particularum inter se & sibi impingentium oriri, quam ab attritu earum & arteriarum aliorumque receptaculorum, per quae ille humor maiori vi premitur atque vrgetur. Ostendit etiam, in maioribus arteriis, maiorem vim sanguinis continentibus, longe minorem incurfionem particularum in illarum latera fieri, & his pauciores particulas impingi, & ob id, si caetera paria sint, & si sanguis aequali celeritate moueatur, & aequalis etiam renixus sit, eum longe minus in iis concalescere, quam in minoribus fistulis. In his enim eum multum coarctari premique, & ita moueri, vt inter illas & singulas fere sanguinis particulas attritus sit. Cum vero, id quod adductis experimentis confirmat, aequalis fere sit calor in omni corpore, si cutim excipias, quae ab aere alluitur & plurimum mutatur, huius aequabilitatis non aliam causam esse docet, quam, quod sanguis in arteriis maioribus longe maiori pernecitate velocitateque propellatur, quam in exiguis minorum

α) Vide ROBERTI HOOKS *Micrographiam Obs. VIII. p. 44. Schem. V.*

β) In *Dissert. de Sanguinis incalescentia, seu accensione*, p. 31.

γ) In *Tractatu de Animalium calore*, qui cum alio, *de Similibus Animalibus*, Londini Anno MDCCXL, editus est.

fistularum itineribus. In his enim illum tardissime moueri, hanc autem tarditatem, quae corpori frigus allatura esset, corrigi illa plurimarum particularum incurfione in illarum fistularum latera & valentiori earundem pressione. Cum sic ab intelligente diuinaque natura corpori prouisum sit, ut in eo aequabilis ybique calor esset ad varias functiones praestandas aptus ac necessarius, etiam ad hanc prouidentiam illud sapientissimum consilium accessisse docet, ut homo varium diuersumque calorem ferre possit, & eius vicissitudinibus, nisi illae valde immoderatae sint & repentinae, non ita grauiter afficiatur. Nam, nemini ignotum esse, frigore fibras multum adduci, corpusque densari atque minores fistulas in cute arctari, omnem vero calorem quasi ad interiora reprimi, & verum esse, quod HIPPOCRATES δ) prodidit: τὰς κοιλίας χειμῶνος καὶ ἡρος θερμότητας φύσει εἶναι. Ob id enim hyeme omnibus visceribus maius robur ad praestandas omnes naturales actiones, praecipue ad cibum assumendum concoquendumque esse. Aestate autem, dum corpus relaxatur, illum internum calorem se remittere, ita, ut illud ab aduentitio, si is vehementior est, non ita grauiter afficiatur. Ex his autem, & aliis, quae ingeniosius ab auctore disputata sunt, cum natura caloris, quo corpus animale tenetur, perspecta sit & patefacta, poterimus statuere, quantum calor ille externus & aduentitijs, cuius ardore totum corpus inflammari & concalescere solet, etiam sub somno possit nocere. Iam vero obseruatio docuit, homini, cuius corpus integrum & sine morbo noxaque est, quamuis is sub vario coelo viuere possit, salubrius esse moderatum frigus, quam nimium calorem. Frigore enim dum omnes fibrae contrahuntur densanturque, ille renixus augetur, quem ad internum calorem necessarium esse supra retuli. E contra fibrarum robur se, si aëris calor augetur, multum remittit, ita, ut illae, & quae ex his coagmentatis facta sunt, viscera, plurimum relaxentur. Illa vero naturali viscerum actione, praecipue pulmonum, quibus spiritum trahimus emittimusque, exteritur perficiturque omnis a cibo in ventriculo & intestinis secretus succus, qui candidus, etiam in rubentem sanguinem vertitur. Dum vero ob id omnis sanguis chylo remixtus per pulmones ducitur, ex iam dictis probabiliter confici potest, eum longe melius coactum confectumque iri, si arteriae naturale robur habeant, & paulo maiorem & necessarium renixum praestare possint. Ad id vero plurimum facere frigus, ex eo intelligitur, quod hoc non solum pulmonum fibrae adstringuntur, sed quod

eo

δ) Sect. I. Aphor. XV.

eo etiam ipse aër densatur, quo, si grauior est & maiorem elasticitatem habet, pulmones, qui eum hauriunt, magis distenduntur, arteriae autem venaeque per pulmones ductae, & in his a corde diffusus sanguis, chylo aliisque succis remixtus, valentius comprimuntur. Coarctatis vero, certa ratione, his arteriis, datoque valentiori renixu, humor cogitur coquiturque, & in sanguinem rubentem, quo ad conficiendos caeteros succos indigemus, longe facilius ac melius conuertitur, quam, si ab aëre calido fibrae relaxantur, & in dispanfis arteriis sanguis, aëre, qui intus est, turgidus, non sine difficultate & mora, promouetur. Ob id etiam naturae prouidentia factum est, vt spiritus aërque, qui ab homine ducitur, semper frigidior sit, quam pulmones, & reliquum corpus, esse solent, & vt pulmones, atque omnis, qui per eos labitur, succus ex illo aliquantum refrigescant. Si enim aëris, qui spiritu in pulmones ducitur, tantus calor est, quantum corpus nostrum naturaliter habet, homo vel praefocatur, vel certe intolerabilibus angoribus vexatur ac conficitur, quod sanguis omnis vehementer concalescit. Sanguinem vero & lympham aequè nimio calore ac quiete & frigore cogi & contrahi, aliis obseruationibus compertum certumque est. ε) De quibus, cum alibi dicendum sit, iam

ε) Vide, quae habet HERMANNVS BOERHAAVE in *Chemiae T. I. p. 274. Edit. Lugd. Bat.* Conf. IO. ARBUTHNOTS *Essay concerning the Effects of Air on human Bodies, Chap. VI. §. XXVIII. p. 159. & Chap. IX. §. XXXII.* STEPHEN HALES *Haemastatics p. 97.* ostendit, rubentes sanguinis globulos maiorem elasticitatem consequi ex valentiori pressione in pulmonibus per aëra frigidum. Experimenta BOERHAAVII in dubium vocauit & illis alia opposuit MARTINIVS de *Animalium calore, Cap. I. p. 138. & p. 144.* qui vero iis nihil aliud probauit, quam hominis fabricationem eam esse, vt eius corpus vario & multum inter se distanti calori accommodatum sit, adeo, vt is etiam per aliquod tempus in aëre viuere possit, qui similem, vel etiam maiorem, feruorem in se contineat, quam, qui naturaliter in corpore est. Haud tamen negat, id non sine magno incommodo, & sanitatis etiam dispendio, imo vitae periculo, in locis aestuosissimis fieri. Experimentis maiori diligentia factis controuerfia diiudicari poterit, & ostendi, quantum calorem homo ferre possit, cum plura animalia, etiam illa, quae diutius, quam alia, vitam retinere solent, veluti feles, in caldariis celerius fuerint extincta, quibus ex ore magna vis rubellae & foetidissimae salinae ante mortem effluerat. Haec vero, quae spatio quadrantis horae inciderunt, probant, cum ex eiusmodi feruore humida corporis celerrime putrescere soleant, quantam vim ad perniciales acutosque morbos gignendos augendosque habeant nimii calores, siue ab igne fuerint, siue a sole.

iam hoc satis esse opinor, vt concludere possim, nimium calorem illam pulmonum actionem, sanguinisque rubentis confectionem, impedire, cum aere, qui calore nimium tenuatus est, nec illi satis possint dilatari, nec etiam succus in arteriis venisque, per quas ducitur, recte possit moueri, confici, ac in rubentem sanguinem conuerti. Ad somnum tandem veniamus, quo, cum veteri Philosopho loquor, ζ) *animus contrahitur quasi, labitur ac concidit*, non aliam ob causam, quam, vt corporis vires reficiantur, idque iterum aptum fiat ad omnem sensum atque animale motum praestandum. De somni natura & admirabili ad redintegrandas animi corporisque vires efficacitate in medicorum & philosophorum libris vberius disputatur & fufius, quae iam multis persequi conclusae sercriptionis angustia non finit. Omnia, quae in eo & vigilia incidere solent, ostendunt, alternam requiem propterea animalibus necessariam esse, vt, dum animo corpus membraque, quibus ille sustinetur, & illi interpretes ac nuncii rerum, sensus, subtrahuntur, atque, dum hi omnes quiescunt, vigente interea & non perturbata omni vitali atque naturali actione, nouus succus paretur, cerebro neruisque, quibus omnis sensus & animalis motus praestatur, accommodatus. Si enim huius succi in corpore penuria, & illud eo quasi exhaustum, est, obdormiscimus & somno consopimur, id quod etiam fit, si ille humor, sanguini confusus, per arterias ad cerebrum pertinentes in cortice cerebri haud secerni, nec per medullae fibras neruosque diuidi potest. Quare continens somnus iis esse solet, quibus cerebrum, ab humore ex suis receptaculis misso, vel a diffracta caluaria, compressum est, vel, si ex alia causa arteriae in cortice praeclusae sanguinem, aliumque succum, non recipiunt. Omni vero animali post naturalem placidumque somnum experrecto noua vis nouusque vigor est, & mira quaedam ad omnes illas functiones administrandas alacritas. Hoc vero, quod per somnum efficitur, non alia quauis re, nec vlllo cibi potionisque genere obtineri posse, compertum est. Curandum igitur omnino, vt somno recte vtamur, & eo illam, quae nobis adeo necessaria est, refectionem consequamur, cum somnus, si is placidus non est, in acerrimum & omnes vires frangentem laborem conuerti possit. Hoc vero in iis accidere, qui eum in percalefactis dormitoriis cubiculis capiunt, ex haecenus dictis intelligitur.

Tenuato

ζ) ZENONIS verba sunt, quae adducit CICERO *de Diuinatione Lib. II. Cap. LXVII. p. 1175,*

Tenuato enim per calorem aere, extrinsecus adueniente, ille in arteriis venisque cum sanguine conclusus aer natura sua dispanitur, quo etiam illae arteriae venaeque, per quas is mouetur, maiorem in modum distenduntur, ita, vt deficiat ille renixus & sanguis non aequabili & facili, sed impeditiori, motu per pulmones agatur. Etiam chylus sanguini confusus non satis concoqui potest, sed crudus manet, ita, vt materia desit, ex qua alius succus, ad instaurandas vires spiritusque necessarius, praeparandus est. Concalescente etiam sanguine, totum corpus incenditur, & humor crudus ad cutim, quae sub somno se non parum remittit, propellitur, sudorque elicitur. Sudor vero omnis in recte valentibus alienus est, in aliis vero, vel morbi index est, vel ab hoc proficiscitur. Longe itaque salubrius, & pulmo, & sanguis, etiam tempore hyberno, refrigerantur, si in loco paulo frigidiori dormitur, ita, vt corpus stragulis mollibus, non nimis tamen grauibus & molestis, quibus illud etiam afficitur & accenditur, bene opertum sit. Hoc significasse videtur CELSVS, η) cuius verba haec sunt: *Erectior mens est, & melius concoquitur, ubi frigus quidem est, sed cauetur.* Etiam hoc, quod iam proposui, quamuis a pluribus, etiam iis, qui de somno ad sanitatem componendo scripserunt, neglectum fuerit, a praestantissimis tamen Medicis notatum lego. HIPPOCRATES, vel, quisquis est Auctor eorum voluminum, quae historias morborum epidemicorum complectuntur, id paulo obscurius declarauit, qui homini, qui natura calidus est, commendat τὸν ὕπνον ἐν ψύχει ἐπιβεβλημένῳ, *somnum in frigore, stragulis operto.* θ) Et paulo post: ἐν θερμῷ φύσει, καὶ θερμῇ ὥρῃ, κοίτη ἐν ψύχει παχύνει, ἐν δὲ θερμῷ λεπτύνει. *Eum, qui natura percalidus est, & calido tempore cubile in frigido crassum facit, in calido extenuat.* Corpus vero densatur, vel crassius fit, si omnes succi in eo recte conficiuntur. Hoc enim sub somno fieri, idem auctor agnouit, qui eodem libro ι) prodesse dicit τὸν πόνον τοῖσιν ἀρθροῖσι, καὶ σαρκὶ σίτον, ὕπνον δὲ σπλάγχνοις, *laborem articulis, cibum carni, somnum visceribus.* Inter alios vero ab aetate nostra propiores adduco duos excellentes Medicos singulari prudentia & multo usu atque exercitatione praeditos, NICOLAVM PISONEM, κ) & FRIDERICVM HOFFMANNVM, λ) Prior

B

ver-

η) Lib. I, Cap. IX.

θ) Epidem. Lib. VI, Sect. IV. §. XXXV. T. I. p. 808 & 809.

ι) Sect. V. p. 810.

κ) De cognoscendis & curandis morbis, praecipue internis, Lib. I. C. IX, p. 59.

λ) In Medicinae Ration. Systemat. T. I, P. III. Cap. XII, p. 609.

vertiginosos *somno diurno, eoque, qui in loco calido capitur*, prohibet, alter vero laudat *pro somno capiendò cubacula ampla & perspirabilia*, ea vero, *in quibus aer arcte conclusus vel fornacibus calefactus est*, vehementer improbat. Et quilibet in se experiri potest, in cubiculis calefactis somnum ferelassare, eumque, nec tantam virium refectionem, nec menti alacritatem, nec corpori agilitatem, afferre, quantam percipimus, si ex somno in cubiculo frigidiori expergiscimus. Maxime autem percalefactum cubiculum iis alienum esse puto, quibus caput ex contentione & animi fatigatione imbecillum est, nec non aliis, qui sanguinis profusionem timent, ut alia morborum genera, in quibus id perniciosum esse potest, omittam. Sed tamen quandoque non solum senibus, sed aliis in multi generis valetudinibus, veluti in articulorum doloribus & rheumatismis, & si humor, qui in aliqua sede coit, discutiendus, & corruptus, per sudorem euocandus est, utilius esse potest, si in aëre tepido corpus somno committitur. Nec tutum est, imbecillis, qui mane ex varia occasione, veluti ex abundante coena, insudant, corpus, quod sudore madet, si hyems est, frigore repente adstringi. Quare his expedit, ante paulo, quam surgunt, cubiculum calefieri, quod, si luculento camino fit, quo caliginosus per nocturnas exhalationes aër educitur, longe salubrius est, quam, si ardentibus fornacibus, quales nobis plerumque in usu sunt, inclusus calor excutatur. Omnes tamen monendi sunt, ne id, quod interdum valetudinis causa recte fieri oportet, quotidianum habeant, & ne ii, qui recte valent, voluptatis causa ac moribus ad mollitiem lapsis corpus debilitent. Etiam iis, qui a firmis parentibus geniti, haud molliter educati, & exercitatione robusti sunt, omnes has observationes utiles non esse, sed superuacuas, profiteor, cum tales se nullis legibus obligare debeant.

Firmam autem corporis constitutionem, rerum bonarum maximam & praecipuam esse, illamque plurimum literarum artiumque studio inferuire, suo exemplo docet

Nobilissimus Doctissimusque Candidatus

SAMVEL KRETZSCHMAR,

Palaeo-Chemnicensis, Misnicus.

Is enim Anno MDCCIX d. XIV. Septembris in rure ab honestis, sed humilioribus, parentibus, & patre quidem solerti bonoque agricola, natus, per sex annos humili cultu, ita tamen, educatus fuit, ut communes doctri-

doctrinas, quibus puerilis aetas impertiri solet, in literario illius pagi ludo a publico Magistro acceperit. Iam illo tempore in puero eluxit infusus & fere incredibilis literarum amor, a quo etiam, postquam pater ei morte ereptus esset, & mater alii nupsisset, se nulla re abduci passus est. Tantum enim abfuit, ut nostro eam, quae puerum inceserat, literas medicinamque discendi cupiditatem, tum vitrici eum ad austeros & illiberales, eosque continuos, labores compellentis duritia & asperitas, tum copiarum familiarium angustia, tum alia, quibus is premebatur, mala domestica, potuerint eripere, quin illa potius cum aetate adoleuerit. Libros enim quosdam Germanicos, ad rem herbariam pertinentes, nummulis coemerat, quos vnciatim, genium suum defraudans, comparerat, quos libros clanculum, & non animaduertente vitrico, qui inexorabile odium in libros conceperat, summa cum voluptate legit. Is vero tandem iam adulta aetate in scholam venit, quae Chemnicii, in dulci mihi quae semper chara patria, floret, & optimis magistris, praecipue autem Rectori, DANIELI MVLLERO, sua consilia aperuit, quae de literarum humaniorum studiis ingrediendis coeperat. Illo autem venerabili Viro, qui hoc ipso, qui vertitur, anno, senectute atque aduersa valetudine confectus, obiit, nemo vnquam integrior sanctiorque fuit, id quod ego firmissime asseuerare possum, qui adolescens eius praeceptis & institutione per octo annos formatus sum. Is nostrum a proposito non deterruit, sed consilio, opera & ope adiuuit, & animum non parum confirmauit. Dubito, me fidem habiturum esse, si iam enarrarem omnes nostro circumfusas molestias, quae eum in hoc disciplinarum studio adeo grauiter affecerunt, ut etiam, caeteroquin firmus, non semel ex inopia duroque & parciori victu & antelucanis lucubrationibus aegra valetudine fuerit oppressus, & quasi emaciatus. Nam, ut interdiu literis studere posset, noctu aliis rebus operanda fuit, quo parciolem & quotidianum victum, & illa sibi pararet, quae ad implenda naturae desideria necessaria erant. Has omnes & plures difficultates ita eluctatus est, ut in bonarum literarum studiis discendi progressionem firmiores profectus fecerit. Quibus praeparatus, anno seculi tricesimo secundo ad nos venit, & pari industria dies noctesque in artem medicinalem ediscendam incubuit, caeterum, pariter egenus, in victu cultuque nihil mutauit. Tandem, cum eius inopia beneficiis quibusdam leuata esset, nouus ei animus additus fuit, ut accuratissima diligentia omnia, quae ad artem faciunt, fuerit persecutus. Anno M DCC XXXVII

se obtulit Ordini nostro, vt in eius profectus inquireremus, & omnium laudem primosque in ordine atque Bacculaurei honores consecutus est. Cum vero modicam pecuniam ex annuis stipendiis parsimonia retinuisset, ea instructus magnum iter ingressus est, & totam Germaniam, Belgium, maiorem nobilioremque partem Britanniae, Galliam, Italiam, Heluetiamque, peragrauit, & vbique, praecipue Lutetiae, vbi, per nouem menses commoratus, nosocomia & dexterrimos in chirurgia magistros frequentauit, artis scientiam plurimum adauxit. In itinere, parum de externis commoditatibus vitaeque iucunditate sollicitus, aliquoties in maximum periculum, & extremum fere discrimen, adductus est. Tandem, itinere confecto, ad nos hoc anno reuertit & nomen inter Candidatos professus est. Iterum specimina edidit, & nobis ostendit, medicinae scientiam, quam habet, non triuialem, sed praeclaram & exquisitam, esse. Hanc vero, quam tam acri studio & aerumnabili labore consecutus est, summis, quos dare possumus, honoribus esse decorandam, vno ore omnes professi sumus. Illi igitur ei decreti sunt, & mihi, Pro-Cancellario constituto, a Gratioso Ordine data fuit prouincia, eos, more solenni & antiquo, dignissimo Candidato conferendi. Dictus dies est XXVII. Octobris, quo is Dissertationem de *Balneis vaporosis natiuis*, quam ipse ex obseruationibus in itineribus factis conscripsit, disputandam proponet.

Finita vero disputatione, more a maioribus nobis relicto, Candidato dabo potestatem, &, quod aiunt, Licentiam Doctoris titulum capeffendi. Summo honori, & Ordini nostro, & Candidato, & mihi, futurum est, si Vobis, *RECTORE ACADEMIAE MAGNIFICO, ILLVSTRISSIMIS COMITIBVS, VTRIVSQUE REIPVBLICAE PROCERIBVS, GENEROSIS AC NOBILISSIMIS LITERARVM STUDIOSIS*, praesentibus audientibusque, haec peragere potero. Quapropter, vt ad hanc Panegyryn accedere & Clarissimi Candidati merita collaudare velitis, etiam atque etiam, pro Vestra in nos perpetua & maxima beneuolentia maiorem in modum peto atque contendo. P.P. Dominica

XXI post Trinitatis clō lō ccxli.

LITTERIS, BITTORFFIANIS.